

De Urlaubsploon

De Babbe kummt ins Haus: Feierowend fa heit.
„De Gaade is gegraab, jetzt isses soweit:
Morje, wenn's Wedda is scheen,
konnschde Pädscha trombele unn säje gehn.“
Jetzt e Bierche, mit de Fieß in de Schlabbe
so fiehlt sisch's wohl, unser Owverhaupt, de Babbe.

„Hallo,“ rufde Bub, kummt die Hausdier erinn,
„heit war e schdrommer Dah, wie mied isch bin.
Was gebbt's ze esse, Fleisch, Wurschd odda Fisch?
Ish mache misch nur im Bad bissje frisch.
„Do bin isch jetzt drin,“ ruft sei Schweschda eraus.
„Ish wäsch mei Hoor unn stehn unner de Braus“

De Kläänschd schdirmd erinn, schlAAD die Dier, dasses kracht.
„Ish honn geschrieb, gereschend, all Aufgawe sinn gemacht.“
Jetzt sitze se allegaa froh unn frisch,
ringsum de scheen gedeggde Disch.
Die Mamme bediend, denkd: „Mei Famillje hat's scheen.
Awwer waade nur, wenn mir in Urlaub gehn!

De Babbe hat vaschproch, wenn all e bissje schpare,
kinne ma das Johr aach groß in Ferie fahre.“
Die gonz Famillje hat jetzt unscheniert
sämtliche Proschbegde schdudierd.
Nun isses soweit, sie misse sisch entscheide
unn Vorschläsch mache vunn alle Seide.

De Jingschd fongt ohn: „ Mamme, fahre ma doch wie eh unn je
middem Wohnwohn onn de Boschdalsee
Dort konn isch schwimme, Dach fa Dach.
Unn noh de Ferie wird donn es Freischwimme gemach.“
De Groß mennt, de Urlaub solld nit so deier sinn,
domit er endlisch sei Mobedd kinnt krien.

Dem Määde is das Wassa uff die Miehl,
denn aach e Fiehrerschein koschd heit jo viel.
De Babbe grinst, saht erleischderd donn.
„Was mir doch vaninfdische Kinna honn.“
Die Mamme, sunschd e vaschdännisch Fraa,
gebbt sisch so schnell noch nit geschlah.

„Unn deins, Babbe, eraus midda Schproch?“
„Ei, de Waldi, Mamme, das wäaschd du doch.
Mir hädde denne Hund jo här misse genn.
Iwwaleh mol, unser Waldi in fremde Hänn.“
„Noja, „ saht die Mamme, „isch hädd misch halt gefreid,

aach emol bediend ze werre wie onnere Leit.“

„Wenn's das nur is, das is doch kä Problem.
Mir mache dir's im Urlaub dehemm aach emol scheen.
Du brauchsched disch nit alläään ze quäle.
Die Aawedd duun mir vier uns dääle.
Sie duud vunn äänem zum onnere gugge –
äns zu vier – was sollse noch mugge.“

„So is das also, isch bin eisch nit bees.
Fa wasses villeischd gudd is, wer wääß, wer wääß.
Gudd donn, so soll's sinn, meinetweje:
Wenn isch's mir jo so rischdisch iwwaleje:
Fa was solle mir in die Ferne schweife,
wo's Gudde is so nägsched ze greife.“

Unn iwwahaabd, warum in die Fremde gehn,
wenn's dehemm doch is so rischdisch scheen!

Helene Keller

